

## Excursiun d'atun dalla 3./4. classa sil Lag Serein e Verclisa

Dalla pli fina bial'aura havein nus priu la cabina dallas 9 ed essan arrivai cuort sisu si Caischavedra. Leu havein nus saviu admirar co il Marcus Levy ha transportau betun cun il helicopter. Jeu sai buca sche tuts pilots da helicopter sgulan aschi spert sco el. Pli probablamein buca.

Entuorn miezdi havein nus cuntenschiu il Lag Serein. Temps da viadi strusch 2 uras cun ina pintga pausa. Arrivai tier il Lag Serein havein nus magliau e buiu enzatgei pauc, deponiu il sacados e la giacca e lu semess sin via ensi encunter Verclisa (mo in pèr paucs eran gia aschi staunchels che els han stuiu star anavos cul scolast Roger e la scolasta Nora spel Lag Serein. En strusch ina mes'ura havein nus dumignau la via tochen si Verclisa. La Verclisa ei ina planira si els aults sco sche enzatgi vess inaga pli baul construui in plaz da ballapei si leu. Enamiez la planira sesanfla in grond crap, per buca dir in pign grep. Naturalmein che bunamein tuts ein revì sin quei crap. Agl ur dalla

planira da Verclisa han ins ina bellezza survesta sils cuolms da l'autra vart, sil Glatsher da Medel e dalla Val Aletta giuadora tochen giu Mustér nua che il Center da Sport sesanfla. Ed il Lag Serein semeglia mo in puozet naven dalla planira da Verclisa. Turnai anavos da Verclisa havein nus magliau e buiu il venter plein, havein fatg bogn da peis el Lag Serein, fatg da pigliar entuorn il lag, empruau d'emplenir il lag cun crappa ed experimentau sch'ins vegn da far sfundrar ina buora ell'aua.

Encunter suentermiezdi vi essan nus lu puspei semess sin via enviars casa. Nus savein ussa per franc ch'igl ei pli stregn dad vegnir dalla Val Aletta giuadora che dad ir naven da Caischavedra vi Lag Serein. La sera ein tuts turnai staunchels, denton sauns e tafers puspei a casa e pli probabel ha ei buca dau grondas discussiuns pervia digl ir a letg quella sera.

*scolast Mihel*



La 3. e 4. classa a Verclisa. Davostier vesan ins il Lag Serein.

# Nos novs scolarets 2011



Livio Lozza



Alissia Candinas



Leonie Candinas



Jasmin Cabernard



Chiara Manetsch



Pia Lutz



Fabio Rigoletti



Leina Flepp



Alessio Maissen



Aaron Lutz



Cédric Durschei



Jasmin Cajacob

# Rapport dalla viseta da signur Andi Niedermann dil WWF

Igl Andi ei vegnius en scola perquei che nus havein priu atras il tema : Tschéss-barbet ed uors. El ha raquintau fetg bia sur dil tschéss-barbet e sur digl uors. El ha mussau maletgs co ins sa pertgiran las nuorsas per ch'igl uors magli buca ellas. Ei dat era tgauns che pertgiran las nuorsas. Andi ha mussau maletgs co la tauna digl uors vesa ora e ch'el hagi in crap sco plumatsch. Per sut il venter ha igl uors rimnau fein e feglia. Cu ils pigns uorssets neschan ein els circa aschi gronds sco in piertg dalla mar. Cun maletgs ha el documentau co igl uors ha era rut en en in ualer.

Silsuenter havein nus fatg duas gruppas. Jeu erel igl εμπrem tier il scolast Bruno. Leu havein nus mirau conta ossa ch'in tschéss-barbet maglia per di. Quei ein buca meins che 500gr. Nus havein lu aunc mirau con ferm acid ch'il tschéss-barbet sto haver en siu magun per barschar si tut quella ossa. All'entschatta havein nus empurau ora cun acid da citrona. Suenter havein nus empurau ora cun acid da sal. Quei havein nus empruau ora sin ina crosa d'in iev e sin in ies. Nus havein era aunc astgau pitgar dapart ossa sco il tschéss-barbet fa cun schar curdar ella sin ina platta da crap.

Suenter essan nus stai tier igl Andi. Leu havein nus mirau la toppa digl uors, dil luf e dil tgaun. El haveva aunc priu cun el pials. Ina pial era quella digl uors, ina dil luf ed ina dil luf-tscherver. Nus havein astgau tucrar en quellas pials. Quella dil luf-tscherver er la pli fina. Andi haveva aunc priu ina cavazza d'in uors. Quella era greva. El ha aunc declarau entginas caussas dil tgaun e digl uors. Ils uors han 32 dents.

Il davos havein nus aunc dau in giug. Quel haveva num: 1, 2, 3. Andi tschentava damondas e nus stuevan ir tier la numera ch'ins manegiava che seigi endretg.

Jeu quetel che quei seigi stau fetg interessant. A mi ha ei plaschiu.

*Flavia Bundi, 6.classa*



*Il tschéss-barbet ei era da casa tier nus.*

## Nies viadi da scola cun ils lamas

Nus dalla 3. secundaria e reala havein fatg ils 15 entochen ils 16 da settember nies viadi da scola. Il highlight da quei viadi ei staus che nus essan vegni accompignai da 16 lamas che han purtau nossa bagascha. A Sumvitg ha nies viadi entschiet e da leu anora essan nus viandai entochen tiel Lag da Laus.

Leu havein nus gentau e gudiu la bialaura. Silsunter essan nus semess sin viadi tier nies plaz da durmir. Igl εμπrem eran nus stai empau surstai e trumpai da buca veser leu ina tegia. Aschia havein nus stuiu baghegiu si sez tendas per durmir.

Denton havein nus tuttina giu ina liunga e biala sera ensemen, cun ina buna tscheina cuschinada sul fiug aviert. Suenter in bien solver il di suenter essan nus semess sin viadi encunter la Garvera. Naven dil pli ault punct leu, ca. 2150 m, essan nus lu serendi alla staziun da Rabius. Cun agid da nos lamas ha quei viadi lu mo cuzzau 3 uras.

*Lavinia e Vanessa, 9.classa*



*Cun lamas viers il Lag da Laus*

## Viadi d'atun dalla 5. e 6.classa 2011

Allas 8:15 uras essan nus i naven da Mustér cugl auto da posta. Nus essan i tochen enta Fuorns cun igl auto. Ei era aunc detg freid. Suenten in viadi a pei da circa 1 ura essan nus arrivai tier la nova punt da Mutschnengia. Quella ballucava ualti fetg. Leu havein nus fatg ina pintga pausa. Suenten essan nus i vinavon dad ina via catramada siadora. Avn che nus essan arrivai a Stagias havein nus aunc biu in tschéss-barbet. Si Stgias eran nus ca. allas 11:15 uras. Leu havein nus fatg in fiug ed havein astgau barsar sevelas. Cun nus havein giu finiu da gentar havein nus fatg ina lutga cun aua. Quasi tuts eran il davos bletschs. Suenten quella lutga havein aunc stuiu ruimar si il plaz. Allas 13.45 uras essan nus semess sin viadi encunter Mustér. Lu havein nus entupau il Lucas. Siu bab haveva transportau el e la Helena tochen si Stgias. El ei allura era vegnius cun nus engiu tochen a Mompé Medel. Leu havein nus fatg astgau ir sin tualetta. Ils scolars dalla emprema e secunda classa ein era vegni leu. Nus essan i vinavon tochen a Cufions e naven da leu a Sontga Gada. Nus havein gidau da purtar ils sacados dils pigns che pudevan buca pli. Allas 15:30 uras eran nus sil plaz scola.

Il viadi d'atun ei staus lessigs. Nus havein giu fetg legher.

*Valeria Hendry, 6.classa*



*La nova punt da Mutschnengia ei ina dallas attracziuns dil viadi da scola*

Il viadi ha entschiet la damaun baul allas 8.30 uras a Fuorns. Cu tuts ein stai serimnai ha la spassegiada entschiet. Il bia entupavan ins mo clavaus ed ei mava mo pauc si ed engiu. Suenten cuort mument ei in grond grep vegnius, nus stuevan ir sur ina punt ch'era fermada vid il grep. Gia essan nus arrivai a Matergia e Druel. Cu nus essan stai tras il vitg entscheveva la via ad ir ensi. Ei vegneva pli e pli stregn. Suenten in mument ha ei entschiet a vegnir uaul. Cu nus essan stai atras igl uaul stevan nus avon la gronda punt da Mutschnengia che pendea dad ina vart a l'otra. Nus havein giu grond plascher d'astgar ir suravi. Ils biars fatgevan aunc ir si ed engiu la punt. Cu nus essan stai suravi havein nus fatg ina pausa. Ils biars buobs ed in pèr buobas han magliau sin la punt. Silsuenten havein nus continuau il viadi. All'entschatta mava ei fetg teis ensi. Suenten eis ei buca vegniu aschi teis pli. Nus eran bunamein si e tuts speravan ch'ei detti ina gronda e legra pausa. Sco che nus essan arrivai si Stgias, havein nus entschiet a far fiug. Tuts levau gidar a far il fiug, mo lu havein nus eligiu in aschi numnau „schef da fiug.“ Ils buobs han all'entschatta fatg da pigliar entochen ch'il fiug ei staus preparaus. Suenten ha ei dau in bien gentar e lu han bunamein tuts sprizzau giu in l'auter cun aua. Lu essan nus semess sin via encunter Mustér. A Mumpé-Medel havein nus aunc fatg ina cuorta pausa. Silsuenten essan nus i dad ina via giu entochen Cufions. Lu essan nus arrivai tier la baselgia da Sontga Gada. Lu essan nus i dalla via ora entochen tier la scola. Tuts eran leds da saver ir a ruassar a casa.

*Martin Defuns, 5. classa*

## Ina nova pagina d'internet



Finalmein, suenter pli liung temps d'emprova (ed exercezi) ei nossa nova pagina d'internet online. La pagina ha uss in'atgna adressa che secloma [www.scoladisentis.ch](http://www.scoladisentis.ch). Cun quella midada semidan era las adressas da mail dils scolasts, denton eis ei prudent da dumnadar mintga scolast cun tgei adressa ch'el lavura. La homepage porscha fetg bia informaziuns, buca mo davart la scola sezza, mobein era pils geniturs e patruns. Ei vala pia la peina da far ina viseta. Cun l'introducziun dalla nova pagina vein nus era

decidiu d'edir questa gasetta mo pli en fuorma digitala. Quei porta entgins avantatgs e spargna cuosts. In grond avantatg ei segir che vus saveis contemplar las fotografias en color. Cul sistem da fotocopiar eran quellas per part da schliata qualitat. Plinavon essan nus buca pli ligiai vid in diember fix da paginas. Gest questa edizium cun sias sis paginas caschunass problems ella producziun. Nus sperein perquei che ton la pagina sco la gasetta fetschien buns survetschs.

### Program da scola 2011/12

Vacanzas d'atun	gliendisdis	10-10-11	–	venderdis	21-10-11
Vacanzas da Nadal	gliendisdis	26-12-11	–	venderdis	06-01-12
Vacanzas da sport	gliendisdis	27-02-12	–	venderdis	02-03-12
Vacanzas da primavera	gliendisdis	30-04-12	–	venderdis	04-05-12

Finiziun digl onn da scola 2011/12                      venderdis ils 22.06.2012

Entschatta digl onn da scola 2012/13                      gliendisdis 20.08.2012

#### *Firaus e dis libers:*

Numnasontga	01-11-2011
Sogn Martin (di da fiera)	suentermiezdi liber
gliendisdis tscheiver	20-02-2012
Sogn Giusep (gliendisdis)	19-03-2012
Pastgas	06-04-2012 tochen 09-04-2012
Anceinza	17-05-2012
scolaziun interna	18-05-2012
Gliendisdis-Tschuncheismas	28-05-2012
Sontgilcrest	07-06-2012